

欽定儀禮義疏

第二
玉冊

欽定儀禮義疏卷第十五

聘禮第八之一

正義

鄭氏康成曰。大問曰聘。諸侯相於久無事。使卿

相問之禮。

賈疏下記云。久無事則聘焉。故鄭據久無事而言。

小聘使大夫。

賈疏

下經云。小聘曰問。其

禮如爲介三介是也。

周官曰。凡諸侯之邦交。歲相問

也。殷相聘也。世相朝也。

賈疏大行人職文。鄭彼注。小聘曰問。殷中也。久無事又於

殷朝者及而相聘也。父死子立曰世。凡君卽位。大國朝焉。小國聘焉。皆所以習禮考義。正刑一德。以尊天子也。歲相問。殷相聘。聘義所云。比年小聘。三年大聘。是也。於五禮屬賓禮。大戴第

十四。小戴第十五。別錄第八。敖氏繼公曰。此篇主
言次國大聘之禮。賈氏公彥曰。大行人職。上公九
介。侯伯七介。子男五介。又云。凡諸侯之卿。其禮各下
其君二等。聘義。上公七介。侯伯五介。子男三介。是諸
侯之卿介。各下其君二等者也。若小聘曰問。使大夫。
又下其卿二等。此聘禮。是侯伯之卿大聘。以經云五
介。上介奉束錦。士介四人。皆奉玉錦。又孤卿建旌。此
云及竟張旌。此見侯伯之卿大聘。又玉人云。琢圭璋。

八寸。璧琮八寸。以類聘。據上公之臣。公食大夫禮。俎實倫。膚七。據子男之臣。各舉一邊而言。明五等俱有。是其互見爲義也。

聘義。比年小聘。所謂歲相問也。三年大聘。所謂殷相聘也。左氏傳昭九年。孟僖子如齊。殷聘禮也。杜注云。自叔老聘齊。至今二十年。禮意久曠。今脩盛聘。以無忘舊好。故曰禮。則三年爲大聘之常期。其有他事故。乃或曠也。鄰國君臣以禮相與如此。講信修睦。兵

革不試而衣冠玉帛之典隆矣。又案以此篇觀之。
一聘也。而儀物之繁多。禮節之委折周詳如此。則諸
侯相朝。與朝聘於王朝。及王朝之下聘。當更盛焉。可
知也。

聘禮。

圖聘猶問也。春官占夢職。季冬聘王夢。但聘重而問輕
耳。

君與卿圖事。



鄭氏康成曰圖謀也謀聘故

賈疏。謀聘者為久無事則聘故謂有事故。

或因聘。或特行。記云。若有故。則卒聘。束帛加書。將命。是因聘者也。晉侯使韓穿來言汶陽之田之類。是特行者也。

及可使者

賈疏。謂於三卿之中選可使者。

謀事者必因朝

賈疏。欲取對眾共詢。

之意。其位。君南面。卿西面。大夫北面。士東面。

賈疏。儀禮內見諸侯燕朝。

燕禮是也。又見射朝。大射是也。不見路門外正朝。案燕禮大射儀。皆云卿西面。大夫北面。士東面。公降階南面揖之。正朝當與二朝面位同。故注以燕大射約之也。



天子五門。皋庫雉應路。外朝在庫門之外。秋官小司

寇掌外朝之政。以詢萬民。朝士建外朝之法。是也。治朝

在路門之外。夏官司士正朝儀之位。射人掌國之三公。孤卿大夫之位是也。燕朝在路門之內。其堂卽路寢。夏官大僕正燕朝之位是也。外朝治朝皆無堂。其治朝於外朝則爲內。於燕朝則又爲外。卽此疏所謂正朝也。諸侯三門。庫雉路。外朝在庫門外。內朝在路門內。亦路寢也。治朝在路門外。亦正朝也。凡視朝君臣皆立。此圖事亦然。下詳之。

遂命使者。

使師異反下使者並同

正義鄭氏康成曰遂猶因也。既謀其八，因命之也。賈疏

注可使聘使卿。賈疏經云及竟張旛者官司者是也。聘使卿常職孤卿建旛故知使卿也。

昭三十年傳鄭游吉對晉士景伯先王之制嘉好聘

享之事於是乎使卿魯所使聘於諸侯者如公子友公子遂季孫行父仲孫蔑叔孫豹皆卿也則使卿正也其或有非卿者則大夫攝行事所謂小卿者與

使者再拜稽首辭

正義鄭氏康成曰辭以不敏。敖氏繼公曰使者少進

北面乃拜。君親命之。故拜而後辭。變於傳命之儀也。

燕禮大射儀。賓者命賓。賓少進禮辭。不再拜稽首而後辭者。是傳命之儀。與此異也。

君不許。乃退。

正義鄭氏康成曰。退。反位也。受命者必進。敖氏繼公

曰。君不許其辭。故不答拜。使者亦當許而後退。

案使者許諾而退。不再拜稽首者。辭時已拜也。此所謂一辭而許。曰禮辭者。使於四方。不辱君命。人臣之素志。

也。

既圖事。戒上介亦如之。

正義

鄭氏康成曰。戒猶命也。已謀事。乃命上介。難於使

者。易於介。李氏如圭曰。介副也。上介使大夫。敖氏

繼公曰。既圖事。乃戒之者。以其不在圖事之數也。又使
者言命。上介言戒。亦異尊卑也。如。如其禮辭也。使者與
上介必辭者。不敢以專對之才自許。謙敬也。凡聘使有
故。則上介攝其事。

案君所與圖事者卿也。下大夫不與焉。故既圖事乃戒介。既戒則諸大夫皆與聞之。

宰命司馬戒衆介。衆介皆逆命不辭。

正義

鄭氏康成曰。宰。上卿貳君事者也。諸侯謂司徒爲

宰。

賈疏。天子有六卿。天地四時之官。諸侯兼卿官而有三卿。立地官司徒兼冢宰。立夏官司馬兼春官。立冬官

司空兼秋官。左氏傳。杜洩云。季孫爲司徒。叔孫爲司馬。孟孫爲司空。諸侯并六卿爲三兼職焉。是諸侯以司徒爲冢宰。衆介者士也。士屬司馬。周官司馬之屬司士掌作

士適四方使爲介。

賈疏。司士屬司馬。故引以證諸侯司馬戒衆介也。逆猶受也。

敖氏繼公曰。宰命司馬戒衆介。以其卑賤也。不辭者。自別於使者及上介。且任輕。亦不必辭也。衆介受命。亦當再拜稽首。宰說見大射儀。賈氏公彥曰。云不辭者。是其副使之賤者。故不敢辭。

宰。三卿之長也。春秋時。吳宋魯皆有大宰之名。宋王者之後。六卿備焉。魯見於春秋之初。吳見於春秋之末。餘國無之。則注以爲司徒之兼官者諒矣。如晉鄭但云爲政。則爲政者卽首卿。亦大宰也。但異其名耳。首卿亦

時奉使出聘。則命戒書幣諸事。蓋大夫之為小宰者為之士介當四人。

右命使介

宰書幣



鄭氏康成曰。書聘所用幣多少也。

賈疏謂聘鄰國享君及夫人問

卿之等幣。周官司儀職。凡諸侯之交。各稱其邦而為之幣。以其幣為之禮。鄭注幣享幣也。於大國則豐。於小國則殺。宰又掌制國之用。

賈疏王制家宰制國用。

敖氏繼公曰。周

官冢宰以九式均節財用。六曰幣之式。故此主書幣。

也。

命宰夫官具。

正義鄭氏康成曰。宰夫。宰之屬也。命之。使衆官具幣。及

所宜齎。

賈疏。周官宰夫。掌百官府之徵令。云官具者。謂使宰夫命諸官。各具所行幣。幣在官之府。其司

非一。故言衆官。幣。謂享幣。及問大夫。問卿。總具之。所宜齎。謂行道所用多少皆是。

案官所具享幣。以周官約之。則王府所藏獻遺諸侯。良

貨賄之物。及內府所受九貢九賦之貨賄。與所入四方幣獻之良貨賄。凡適四方使者。共其所受之物而奉之。

校人飾幣馬。執朴而從之。凡國之使者。其其幣馬之屬。是也。官所宜齎。則周官外府所掌邦布之入出。以待邦之大用。其財用之幣齎。是也。若圭璋璧琮之等。春官典瑞掌之。不在玉府幣獻金玉之內矣。道塗所經。皆有餽積。故惟齎帛布以備行道之用。且戒不虞也。以上諸職。皆宰書應出之數。宰夫徵令之也。

右具聘物

及期夕幣。

正義 鄭氏康成曰。及猶至也。夕幣。先行之日夕。

賈疏下云厥明

釋幣於禰。是行日。明此夕是先行之日夕也。

陳幣而視之。重聘也。

敖氏繼

公曰。此云及期。則上亦當有請期告期之禮。文畧耳。夕。

如夕月之夕。以夕時陳幣而展之。故曰夕幣。此題下事

也。下不見者。以意求之。

楊氏復曰。夕幣之禮。夕陳幣

以授使者。然授幣而未授主何也。圭聘禮之重者也不

可預授。

案 命使之後。夕幣之前。中閒取具幣齎。治行李。整車徒。

容有旬日。使介從旅得以化其家事。皇皇者華詩序曰。君遣使臣送之以禮樂。燕送之節應在此時。請期告期。面位畧如夕幣。宰由君右命之。

使者朝服帥衆介夕。

朝直遙反下並同注古文帥皆作率

正義

鄭氏康成曰視其事也。

敖氏繼公曰於此云朝

服者嫌朝夕之服異也。下言君朝服放此。

管人布幕于寢門外。

幕音莫注古文管作官今文布作敷

正義

鄭氏康成曰管猶館也。館人謂掌次舍帷幕者也。